

COMUNICATO n. 2859 del 10/10/2023

Konferénz von Zingmindarhaitn: 'z mangda åhevan di trasmisionen atz taütsch vodar österaichegen TV ORF in Trentino

'Z iztase gehaltet in tages von 3 von bimmat in di Sala Trentino von palatz vodar Provìntz da 37[^] Konferénz von Zungmindarhaitn, durchgevüart von provintziàl asesór vor di istrutziung, universitét un kultür pittnàndar pittar diridjénten von Dienst vor di Zungmindarhaitn un européan audit vodar Provìntz. Vo baitom soindase kolegàrt di vortretar von kamöschafn ladinar, möknar un zimbar.

In tageordnung iztada gest zo reda übar bia ma sait gelek pittar tele un radio infomatziung, dòpo azta iz khent augètt in hornung von djar 2022 dar kanàl TML boda hatt durchgètt trasmisionen in di zungen von stòregen trentinar zungmindarhaitn. Tra bintsche zait bartma mang seng in Trentino di kanél ORF 1 un ORF Sport: dar earst bart lazzan seng a pizzle alla darsòrt un di trasmisiong “ Südtirol heute”, un bart gem informatzionen atz taütsch vor di taütschan zungmindarhaitn; dar åndar, anvétze, bart zoang mearar baz åndarst internatzional spòrt un bar helvan zo macha machan spòrt in laüt boda lem in ünsar Provìntz.

Di nòrmen boda schützan di trentinar zungmindarhaitn schaffan, defatte, azta saibe gesichart 'z rècht zo haba informatzionen saiz geschribet saiz durch televisiong in di zungen vo aniaglana kamöuschaft, in di lentar boda di kamöüschaftn lem un zo sichra durch trasmisionen in televisiong azta khemmen augehaltet di kulturàln khennzaichan von ladinar, möknar un zimbar fòlk. Aftz ditza izta khent ågenump dar parér obligatòresch ma nèt vorpintung vodar Konferénz von Zungmindarhaitn zo macha an kontràtt pitt EI Towers, da uantzege boda hatt di frequentzan in Trentino Südtiról, boda auzmacht zo lazza seng da österraichege televisiong ORF in di lentar boda lem di taütschan zungmindarhaitn un in gantz Trentino.

Ma mocht o gedenkhan ke, hèrta nà in sèll boda hatt auzgemacht di Konferénz von Zungmindarhaitn est saitma nà zo sperimentara vor a djar in dienst zo trametra durch HBBTV (Hybrid Broadcast Broadband TV), boda zoaget afte smart tv sachandarn boda ågian in trentinar stòregen zungmindarhaitn. Disa sperimetatziong bart auhöarn atz 14 von madjo 2024. Di Konferénz hatt darzuar geredet übar di problème von traspòrte in di lentar von möknar un zimbar. Aftz ditza hatta geredet di diridjénten von dienst vor da öffentlesche mobilitét vodar Provìntz.

Übarsetzt von Schaltarle vor di zung von Toalkamou vodar Zimbar Hoachebene

(cdt)